

Negociacion di proyecto ex J.F.K School tabata 'habri y profesional'



ORANJESTAD - Un edificio icono den nos enseñansa cu despues di 21 aña di a keda bandona pa bira un instrumento di campananan politico, finalmente lo haya bida bek. Ta trata di e edificio monumental John F. Kennedy cu lo conoce un renobacion completo respetando su estructura original y bira un centro di educacion.

Ayera mainta a keda firma diferente documento di parti di gobierno, AIB y Bohama cu a gana e destaho publico pa realisa e trabou di renobacion y construcion aki. E proyecto tin un balor di 15.9 miyon florin, unda nan lo renoba ex J.F.K School y hunto cu ne lo bin un edificio nobo. E trabou aki lo bin cla

na 2020 pa un total di 6 mil 335 meter cuadra di espacio di oficina.

Den presencia di minister di infraestructura, Otmar Oduber (POR), y su colega di enseñansa, Rudy Lampe (RED), director di AIB, Francis Gil a bisa cu durante e ultimo dos lunanan tabatin un negociacion 'basta habri y profesional' cu gobierno cu lo huur e edificio aki pa 5 aña pa asina centralisa tur instancia cu ta cay bou departamento di enseñansa. Te hasta eventualmente Parlamento Hubenil lo haya su espacio den e edificio renoba aki.

AIB Vastgoed cu ta un compania di AIB Bank ta doño di e edificio aki y esaki ta e prome proyecto cu nan ta realisa. Aña pasa na luna di sep-

tember AIB Vastgoed N.V. a cumpra e edificio aki fei gobierno pa un suma di 5.8 miyon florin.

Acuerdo perfecciona

Sr. Gil a laga sa cu e acuerdo prome a wordo perfecciona, caminda e dos ministernan responsabel pa e acuerdo di huur a keda envolvi. Apesar cu e proyecto aki a wordo concretisa bou e gabinete anterior, gobierno nobo di coalicion (MEP-POR-RED) a dicidi di inventarisa prome algun di proyectonan cu nan a hereda pa evalua nan situacion financiero.

Minister Oduber a bisa cu a base di e re negociacion cu a tuma cu AIB a logra concretisa pa e renobacion aki bira un realidad. "Nos ta kere cu aki no ta trata di cambio di



gobierno, kiermen cambio di proyectonan y su prioridad. Esaki ta un prioridad pa hopi aña caba," segun e mandatario.

Den e acuerdo cu gobierno anterior a firma cu AIB no tabatin envolvimento di ministerio di enseñansa, apesar cu e compromiso di huur ta wordo paga cu presupuesto di e ministerio aki. E ta considera esaki como cierto 'mancomento' cu tabatin den e acuerdo anterior. E principal tabata cu nan no a laga placa disponibel pa huur cu ta mas of menos 3 miyon florin pa aña.

Tambe e mandatario a bisa cu danki na e negociacion ultimo nan a logra scapa casi 1 miyon florin den e proceso aki di renobacion na beneficio di comunidad di Aruba. E ta un deal mas faborabel pa pais Aruba. E ta haya cu ora cu nan ta atende cu fondo publico nan mester percura cu ta wordo uza den un forma mas eficiente posibel.

Nan lo kier bin cu un eficiencia mas grandi riba uzo di edificionan pa evita cu pre-

supuesto nacional no wordo perhudica di un forma grandi. Minister Oduber a gradici APFA cu tambe tin inversion den e proyecto aki mustando confianza den nos economia.

Calidad den enseñansa

Di su banda, minister Lampe a bisa cu esaki ta un soño cu a bira realidad. Segun e mandatario e proyecto aki tin su impacto pa nos desaroyo economico, pero tambe ta bay yuda eleva e calidad di nos enseñansa. E echo cu nan ta trece profesionalnan trahado den enseñansa den mesun espacio nan ta promove cooperacion 'entre tur e mentenan briyante'. Esaki ta necesario pa produci ideanan nobo den cuadro pa mehora nos enseñansa.

Igualmente el a referi riba uzo flexibel di edificionan publico, entre nan e diferente MFA, scolnan cu ta wordo uza pa cierto ora so. Considerando cu nos ta un isla chikito y cu poco recurso, e mandatario ta haya cu nos tin haci uzo maximo di tur nos edificionan nobo y renoba na beneficio di nos comunidad, ya cu nan ta propiedad di pueblo.

